

Bota Sot 17/11/2011

Kamenica përcakton priorititetet për zhvillim urban

Përfaqësues të institucioneve komunale, partive politike, OJQ-ve, si dhe qytetarë të tjera të Komunës së Kamenicës, përmes një debati të hapur publik, të organizuar nga projekti LOGOS kanë përcaktuar priorititetet për planin zhvillimor komunal dhe atë urban, i cili është në proces të hartimit. Kryetari i Komunës së Kamenicës, Shaip Surdulli, ka thënë se plani zhvillimor komunal dhe ai urban është një dokument më rendësi të veçantë për të ardhmen e komunës, pasi që përcakton kahet e zhvillimit në të ardhmen, prandaj pjesëmarrja dhe angazhimi i vëtë qytetarëve në hartimin e këtij dokumenti, ndihmon komunën që këtë plan, ta hartojë në bazë të interesave të qytetarëve.

"Falë mbështetjes së projektit LOGOS, komuna e Kamenicës është duke hartuar këtë dokument që do të ndihmojë edhe në tērheqjen e investimeve nga jashtë, pasi deri tani përkundër interesimit të tyre që të investojnë në këtë komunë, në mungesë të këtij plani një gjë e tillë nuk është arrit të realizohet", ka thënë Surdulli. Ndërsa, Norbert Pijls, koordinator i projektit Zvicër-Kosovë, për qeverisje lokale dhe decentralizim, LOGOS, ka thënë se ekipet punuese të Komunës së Kamenicës, deri më tani kanë bërë një punë të madhe në hartimin e planit zhvillimor komunal dhe se projekti LOGOS. Kurse Ilir Kastrati, koordinator i ekipave punuese në hartimin e planit zhvillimor komunal, ka thënë se deri më tani ekipet punuese për hartimin e këtij

plani kanë përfunduar fazën e parë dhe të dytë të hartimit të këtij plani, kurse tani është në proces faza e tretë e cila parashihet edhe përfshirjen e qytetarëve në nxjerrjen e prioriteteve si dhe në avancimin e punës në hartimin e këtij plani. Ndërkaj, Ismajl Bafitjari, konsulent profesional i projektit LOGOS, është shprehur se deri më tani në komunën e Kamenicës, është bërë një punë e mirë në hartimin e këtij plani. Kadri Qehaja, ish drejtor komunal për urbanizëm, ka thënë se dikur planet në komunë janë bërë nga ekspertët jashtë vendit, të cilët pak kanë marr parasysh interes e qytetarëve, dhe kjo formë e hartimit të planeve përmes eksperimenteve vendas si dhe me angazhimin e vetë qytetarëve do të ndihmojë që këto plane të plotësojnë kërkosat e shumta që dalin për një jetë më të mirë.

Kurse Rexhep Morina, nga Topanica, ka thënë se në lokalitetin e tij ka nevojë të madhe për investime si në ujë të pijshëm, rrugë dhe çështje të tjera. Prandaj gjithë këto kërkesa të qytetarëve të këtij lokaliteti si dhe lokalitetet e tjera duhet të parashihen në plan. Prioritetet që qytetarët e Kamenicës i nxorën në planin zhvillimor komunal ishin masat mbrojtëse për tokat bujqësore, mbrojtja e ambientit jetësor përmes investimeve ku ka degradim të ambientit, sigurimi i ujit për pije përmes pendave të ngritura në lumenjtë e kësaj komune, ngritjen e pikave grumbulluese për prodhimet bujqësore, investimet në infrastrukturën rrugore etj. ■